

I fröie mi, mit öich zäme uf das aktive, vergangene Chiuchejahr dörfe zrüg zuege.

## Allgemeins

Dankbarkeit, - unger däm Motto isch ds vergangene Kirchmeindjahr gstange. Mir hei verschiedenschi Glägeheite gha dankbar z'si. Weni zrüg luege uf üses Chiuchejahr, gsehni ganz vieu Freiwilligi, Personal u Mitarbeitendi, wo sich dür ds Jahr i ihrne jewilige Arbeitsbereiche, mit vieu Engagement igsetzt hei. Ohni au die Freiwillige, mit ihrem härzhaft Aapacke u Ideenriichtung, wär mängs ir KG gar nid oder nume schwär durchführbar. Härzleche Dank geit o a üses Personal u die Mitarbeitende. Sie leichte immer wieder über ds Jahr grosse Isatz für Gottesdienschte, ir Seelsorg, Jugend-u. Autersarbeit, im Sekretariat, ar Orgele u bim zwägmache u putze vo üsne chірchleche Rümlechkeite. Sit afang Jahr wird dr KGR ungerstützt vom Johannes Schneider vo Uttigen u a dr usserordentliche KGV vom 21. März si no Katrin Blatter vo Nofen u d Liliane Geissbühler vo Uttigen, i Rat gewählt worde.

## Aktivität us em Chiuchmeindläbe

Näbscht de aujährlche Aläss, wie Spaghettiasse vo de Konfirmande, dr Riistag u dr Chiuchesunntig, si no witeri, verschieden Aläss düregführt worde.

D Sozialdiakonin Susi Weber het e wiitere Männerchochkurs 55+ chönne düreführe. Idrücklech isch gsi, wie die Manne engagiert a Chochherd gstange si u wie sie stouz vo ihrne gmachte Chochoferfahrige verzeut hei. D Seniorenamitage wärde nach wie vor guet bsuecht u e Feriewuche nach Murten het o chönne düregführt wärde.

O i däm Jahr si vom Samuel Glauser verschieden Jugend-, Zäut- u Konflager organisiert worde. D Amäudige für die Lager loufe über ds Pfarramtsekretariat. Zu de Amäudige ghöre o wichtegi Infobletter über d Ching, wo vo de Eutere müesse usgefüllt wärde. Hie isch e zuenähmendi Gleichgültigkeit vo de Eutere zgspühre. Immer wieder traffe die Bletter zspät oder gar nid i. Die x Telefon, wo de d'Elisabeth von Känel muess mache, für no zu dene Infobletter zcho, bereite ihre e enormi Mehrarbeit. Mir wüsch üs wieder meh Mitdänke u Verantwortig vo de Eutere, es chönnt dr Elisabeth von Känel vieu Arbeit erspart blibe

Das üsi Jugend innerhaub kurzer Zyt viu cha leichte, hei mir ganz guet am 72-Stunde-Projekt chönne beobachte. Innerhaub vo 72 Stung hei si e wunderschöne Begägnisplatz boue, es Stück Waud vom Ghüder befreit u es Unterhautigsprogramm für em Samschtig Abe zämegsteut.

Mit dr Iführig vore Membercharte für aui OASE-Bsuecher, si mir zäme mit em Oase-Leiterteam uf guetem Wäg, d Ruehestörige u dr Vandalismus rund um ds KGH Uttigen i Griff z'übercho.

Am Fescht für die Freiwillige im Novämmer hei Freiwilligi, Personal u KGR bime feine Ässe Kontakte chönne chnüpfe u sich gägesitig ustusche über ihres Engagement ir KG. Es härzlechs Dankeschön a aui Beteiligte. Im Novämmer het d'Veronique Ott, i Zämearbeit mit em Psychotherapeut Art Funkhouser, zwe guet bsuechti Bildigsabe zum Thema „Träume“, düregführt.

Nach langjährige, seriöse Vorabklärige isch d'Chirchmeind scho sit em 1. April 2010 im Bsitz vo dr Pfrundliegenschaft. Mit em Chouf vor Liegeschaft hei mir o d Verantwortig überno, derzue z'luege. Erschti boulechi Massnahme hei scho chönne erledigt wärde.

## Personells

Ganz erfreulich si d Dienschtjubiläe, wo mir hei dörfe fiire. Dr Pfarrer Samuel Glauser mit sire Frou Christiane u ds Sigristenpaar Sonja u Hansruedi Stegmann si sit 25 Jahr für üsi Chirchmeind im Amt. Am 27. Juni hei mir die Jubiläe ir Chiuche gfiiret. Dr Samuel Glauser het i dene 25 Jahr vieu für üsi Chiuche gleischtet, näbscht vielem angere het är üsi Jugendarbeit uf boue. Danke Samuel, danke Christiane, danke Sonja u Hansruedi für öie Isatz über au die Jahr für üsi Chirchmeind.

Im vergangene Jahr hei mir o Abgäng vo langjährige Agsteute gha. Nach 23 Jahr unermüedlechem Isatz im KGH Uttigen, hei mir üsi Sigristin d Elisabeth Glauser verabschiedet. Sie geit in Pension. Per 1. Oktober hei mir d Christine Sieber als nöii Sigristin vom KGH chönne asteue. Ds Fränzi Spring het ihres Sigristenpensum wäge brueflecher Nöiorientierig per 1. Oktober kündet. Äbefaus si d Kündigung vom langjährige Organist Beat Ast u üsere KGR-Sekretärin Rosmarie Maurer per Ändi Jahr bi üs igange. Mir danke öich für e Isatz u wüsch aues Guete uf em witere Wäg. -- Härzlech willkomme heisse mir am 1. Januar 2011 die nöii KGR-Sekretärin Christine Schneider, dr Jugendarbeiter Simon Zwygart u d Monika Neuenschwander, wo künftig für d Sigristin Christine Sieber im KGH d Steuerträtig macht. Mir fröie üs uf ene gueti Zämearbeit mit öich.

## Zuekünftigs

Dr KGR wird o im nöie Jahr witer mit dr Pfrundliegeschaft beschäftigt si. Frage zur Jugendarbeit, zum chiuchleche Angebot für die mittlerei Generation u zu mügleche, nöie Gottesdienstforme, sueche Antworte. Witer sötte d Ressortbeschriebe für KGR nöi überarbeitet wärde! Das si aues Ufgabe, wo mir im KGR möchte agah.-

U itz blibt mir no härzlech z'danke, au dene, wo i irgend ere Art u Wys, vor oder hinger de Kulisse zum Wohl vo üsere Chiuche mithäufe u mitdänke. I fröie mi, o im 2011 mit öich unterwägs dörfe z sy. Bhüet euch Gott!!

